



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*  
*Parlamentu Nasionál*  
**13 Abril 2015**

**JSMP Lamenta ho Dixiplina no Pontualidade Membru Deputadu sira iha Reuniaun Plenaria “Periodo Antes Ordem do Dia”, Segunda Feira, 13 Abril 2015**

Parlamentu Nasionál, tuir Artigu 46. 1 (a) Lei Nú. 15/2009 katak reuniaun plenaria hala’o iha kada Segunda-Feira no Tersa-Feira no iha Artigu 46 (2) prevee oráriu normál funsionamentu 09:00 to’o 12:30 no 15:00 to’o 18:00.

Reuniaun Plenaria Segunda-Feira, 13 Abril 2015 prezide hosi Viseprezidente Parlamentu Nasionál, Deputadu Adriano do Nascimento. Plenaria ne’e hahú ho apresentasaun relatóriu vizita, fiskalizasaun no analiza hosi Komisaun Especializada Permanente 4. Komisaun sira ne’e mak hanesan Komisaun B ne’ebé tau matan ba asuntu defeza no seguransa, Komisaun C ne’ebé tau matan ba asuntu Finansa Públika, Komisaun E ne’ebé tau matan ba asuntu infraestrura, transporte no komunikasaun no Komisaun G ne’ebé tau matan ba asuntu étika.

Tuir observasaun JSMP nian, durante Reuniaun Plenaria ne’e, deputadu barak mak la marka prezensa, mai tarde, halo movimentu ba mai no la fó atensaun ba relatóriu sira. Númeru deputadu sira ne’ebé partisipa iha inísiu reuniaun tuir bankada parlamentár: Fretilin ema na’in 5, PD ema na’in 4, CNRT ema na’in 13 no FM ema na’in 1, total ema na’in 23. Númeru ida ne’e depois menus tan no deputadu balun foin tama iha tuku 11:00 ba leten. Situasaun ne’e provoka Prezidente Meja Parlamentu Nasionál bolu atensaun ba bankada parlamentár Fretilin atu organiza fali deputadu sira hodi bele partisipa iha reuniaun.

*“JSMP lamenta tebes ho dixiplina no pontualidade ne’ebé membru deputadu sira hatudu iha reuniaun plenaria Parlamentu Nasionál nian ne’e. Deputadu sira tuir loloos tenke hatudu ezemplu ida ne’ebé di’ak ba públiku hodi hala’o sira nia knaar ho dixiplina no pontual”,* dehan Luis de Oliveira Sampaio, Diretór Ezekutivu JSMP.

Bazeia ba rezultadu monitorizasaun ne’ebé JSMP halo iha tinan hira nia laran, produtividade Parlamentu Nasionál iha termu halo lei nian tun hahú hosi 2012 to’o 2014.

Atu hetan informasaun kle’an favór kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)

Rua setubal, Colmera, Dili Timor Leste  
PoBox: 275  
Telefone: 3323883  
[www.jsmp.tl](http://www.jsmp.tl)  
[info@jsmp.minihub.org](mailto:info@jsmp.minihub.org)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl

Landline: 3323883 / 77810637